

**ETIČKI KODEKS  
JP Autoceste FBiH d.o.o. Mostar**

Mostar, juni 2014. godine

Na osnovu člana 6. stav 1. Zakona o javnim preduzećima ("Službene novine Federacije BiH" broj: 8/05 i 81/08), člana 17. Statuta Javnog preduzeća Autoceste FBiH d.o.o. Mostar, na prijedlog Nadzornog odbora Javnog preduzeća Autoceste FBiH d.o.o. Mostar Skupština Javnog preduzeća Autoceste FBiH d.o.o. Mostar na sjednici održanoj dana 17.06. 2014. godine donosi:

**ETIČKI KODEKS**  
**Javnog preduzeća Autoceste Federacije Bosne i Hercegovine**  
**društva sa ograničenom odgovornošću Mostar**

**I OPĆE ODREDBE**

**Član 1.**

Etičkim kodeksom (u daljnjem tekstu: Kodeks) uređuju se načela, pravila ponašanja i postupak upoznavanja sa kodeksom koji se primjenjuje na sva uposlana lica u Javnom preduzeću Autoceste Federacije Bosne i Hercegovine (u daljem tekstu: JP Autoceste FBiH), ovlaštene pojedince i zastupnike koje imenuje JP Autoceste FBiH za obavljanje određenih poslova, sve članove Nadzornog odbora, Uprave i Odbora za reviziju i direktora Odjela za internu reviziju te druga lica ugovorno povezana sa JP Autoceste FBiH (u daljnjem tekstu: povezano lice ili povezana lica u skladu sa tekstom).

**Član 2.**

Kodeks je obavezan prilikom obavljanja svih dužnosti u poslovanju JP Autoceste FBiH i sadrži obavezne odredbe u skladu sa Zakonom o javnim preduzećima u Federaciji BiH i Statutom preduzeća.

**II NAČELA**

**Član 3.**

Načela Kodeksa predstavljaju norme ponašanja i odnos povezanih lica prema javnom preduzeću, čije kršenje normi obavezno povlači pokretanje postupka disciplinske odgovornosti.

**Načelo sukob interesa**

**Član 4.**

Povezano lice dužno je izbjegavati stvarne ili očigledne sukobe interesa sa JP Autoceste FBiH u ličnim ili profesionalnim odnosima.

Sukob interesa javlja se kada lični interes povezanog lica onemogućava, ili može onemogućiti poslovanje JP Autoceste FBiH ili narušava sposobnost povezanog lica da ispunjava svoje obaveze i odgovornosti.

Javnom preduzeću nije dozvoljeno da povezanim licima nudi povoljnije uslove od onih koje nudi drugim licima koja nisu povezana sa javnim preduzećem, to:

- članovima uže porodice povezanih lica do trećeg stepena krvnog srodstva ili tazbine, odnosno licima koja žive u istom domaćinstvu sa povezanim licima;

- pravnim licima u kojima je povezano lice ili članovi uže porodice član Nadzornog odbora ili Uprave.

Ako bilo koje povezano lice zna ili je moralo znati da je neko drugo povezano lice djelovalo u suprotnosti sa odredbama ovog člana, to povezano lice je o tome dužno odmah obavijestiti Upravu ili Nadzorni odbor ili drugi nadzorni organ i ostale nadležne organe.

Povezanom licu nije dopušteno odavanje poslovne tajne javnog preduzeća. Postupanje u pogledu čuvanja poslovne tajne definisano je članovima 50. i 51. Statuta Javnog preduzeća Autoceste FBiH d.o.o. Mostar.

### **Načelo zabrana konkurencije**

#### **Član 5.**

Član Uprave, Nadzornog odbora, Odbora za reviziju i prokurist ne smije u tom svojstvu ili kao uposleni u drugom društvu i kao samostalni privrednik učestvovati u djelatnosti, koja bi mogla biti u konkurentnom odnosu na djelatnost javnog preduzeća. Ova obaveza traje za vrijeme trajanja menadžerskog ugovora, odnosno angažmana u bilo kojim organima upravljanja u preduzeću i dvije godine nakon prestanka ugovora o angažmanu. JP Autoceste FBiH može od lica koje prekrši zabranu konkurencije tražiti naknadu štete i ustupanje zaključenih poslova ili prenos ostvarene koristi ili prava iz zaključenih poslova, u roku od tri (3) mjeseca od saznanja za prekršaj, a najkasnije pet (5) godina od učinjenog prekršaja zabrane konkurencije.

### **Načelo usklađenost sa zakonima, propisima i pravilima**

#### **Član 6.**

U ispunjavanju svojih obaveza i odgovornosti povezana lica su obavezna da djeluju u skladu sa zakonima, podzakonskim aktima i Statutom JP Autoceste FBiH.

Povezano lice se obavezuje da, ako dođe do saznanja o informaciji za koju smatra da predstavlja dokaz o materijalnom kršenju zakona, pravilnika i propisa koji se primjenjuju na javno preduzeće, ukaže na datu informaciju Upravi preduzeća, Nadzornom odboru ili drugim nadležnim organima.

### **Načelo postupanja u skladu sa javnim ovlaštenjima**

#### **Član 7.**

Povezana lica su dužna postupati u skladu sa javnim ovlaštenjima, koja su na javno preduzeće prenesena Zakonom o cestama Federacije BiH. Povjereni poslovi, planovi i izvještaji o realizaciji istih treba da budu transparentni, izuzev poslova koji su poslovna tajna preduzeća.

## **Načelo stručne sposobnosti i savjesno postupanje**

### **Član 8.**

Povezana lica javnog preduzeća su obavezna da uz dužnu pažnju stručno profesionalno i savjesno obavljaju svoje funkcije i izvršavaju svoje obaveze u skladu sa ovlaštenjima, odgovornostima i pravilima struke.

## **Načelo zaštite i pravilne upotrebe imovine JP Autoceste FBiH**

### **Član 9.**

Nadzorni odbor, Uprava i Odbor za reviziju, u ispunjavanju svojih obaveza i odgovornosti, obavezni su podsticati na odgovorno korištenje i kontrolu imovine i resursa JP Autoceste FBiH u koju spadaju sredstva rada, podaci, materijali, rezervni dijelovi, intelektualna svojina i objekti, a koju treba koristiti u poslovne svrhe javnog preduzeća.

## **Načelo povjerljivosti**

### **Član 10.**

Povezana lica su dužna poštovati povjerljivost podataka, do kojih dolaze u ispunjavanju svojih obaveza i odgovornosti, osim u slučajevima u kojima objavljivanje podataka odobri nadležni organ javnog preduzeća ili je takvo objavljivanje zakonski utvrđeno. U povjerljive podatke spadaju svi podaci internog karaktera koji mogu biti od koristi konkurentima.

## **Načelo podsticanje prijavljivanja nezakonitog ili neetičkog ponašanja**

### **Član 11.**

Organi javnog preduzeća dužni su uticati na aktivno unapređenje etičkog ponašanja i podsticati na prijavljivanje i dostavljanje dokaza o nezakonitom i neetičkom ponašanju povezanih lica.

## **Načelo zabrane u pogledu kredita**

### **Član 12.**

Javnom preduzeću nije dozvoljeno da na neposredan ili posredan način (putem supsidijara ili sl.) dodjeljuje kredite ili pozajmice zaposlenim u javnom preduzeću ili trećim licima, niti da pružaju usluge garancija ili osiguranja za kredite.

## **Odstupanje i preduzimanje disciplinskih mjera**

### **Član 13.**

Odstupanja od odredaba Kodeksa nisu dozvoljena.

Kršenje odredaba Kodeksa povlači obavezu pokretanja disciplinskog postupka.

### III PRAVILA

#### Član 14.

Pravila po kojima povezana lica treba da se ponašaju su:

##### **Profesionalnost**

Povezana lica će se u obavljanju svojih poslova i zadataka pridržavati pravila profesionalne nepristrasnosti, odgovornosti, čestitosti, transparentnosti, efikasnosti i ekonomičnosti.

##### **Darovi i koristi**

Povezana lica neće tražiti, a ni prihvatiti kako za sebe tako ni za druge darove ili neku drugu korist od osoba koje su ostvarile svoje pravo na osnovu donesenih odluka.

##### **Naknada za rad**

Prilikom obavljanja svojih poslova i dužnosti povezana lica neće prihvatiti nikakvu dodatnu naknadu, osim one redovne koja im sljeduje u skladu sa općim aktima JP Autoceste FBiH.

##### **Nepristrasnost**

Povezana lica će prilikom obavljanja svojih dužnosti jednako se ponašati prema svim strankama koji dolaze u kontakt s javnim preduzećem.

Povezana lica će se pridržavati proceduralnih pravila pri obavljanju administrativnih poslova iz svog djelokruga, a posebno će izbjegavati nezakonite pritiske, čak i ako dolaze od pretpostavljenih.

##### **Radni prostor**

Radni prostor povezanih lica treba odisati urednošću i poslovnošću. Stari spisi i radni materijali moraju biti odloženi u police, ormare i arhivu.

U radnom prostoru može se njegovati cvijeće, u skladu sa raspoloživim prostorom i afinitetima drugih koji koriste isti radni prostor.

Zidovi se mogu ukrasiti odgovarajućim umjetničkim slikama, grafikama i odabranim fotografijama koje su u vezi sa djelatnoću javnog preduzeća.

##### **Ponašanje u službi**

Povezana lica neće, osim iz opravdanih razloga, odlagati svoje radne obaveze i zadatke niti povjeravati njihovo izvršenje drugom, niti prenositi odgovornost za donošenje odluka drugome.

Uvođenje privatnih lica u radne prostorije, osim u namjenske (sale za sastanke i odvojeni prostor od radnog djela), nije dozvoljeno.

Nije dopušteno iznositi neistine, tendenciozne i zlonamjerne podatke i primjedbe na račun drugih. Povezano lice je dužno obratiti se neposredno nadređenom ukoliko ima određenih problema.

Svaki problem se mora rješavati izvan vidokruga stranaka, principijelno i argumentovano, mirno i bez emocija.

Povezano lice materijal i opremu koja mu je službeno na raspolaganju neće koristiti u privatne svrhe, osim u hitnim slučajevima, uz odobrenje nadređenih.

### **Poslovni izgled i odjevanje**

Povezana lica prilikom obavljanja poslova i radnih zadataka trebaju biti uredno odjevena i obučena (čisto, praktično, elegantno) u skladu sa kodeksom odijevanja, uz obavezno nošenje poslovne akreditacije.

### **Kultura komuniciranja**

Međusobni razgovori povezanih lica u prisutnosti stranaka trebaju biti kratki, mirnog tona.

Telefonski razgovori u privatne svrhe moraju biti svedeni samo na specifične hitne pozive.

Povezana lica prilikom vođenja službenih razgovora, u pravilu, daju kratke odgovore i informacije.

Odnosi i ophođenje među povezanim licima zahtijevaju puno uvažavanje razumijevanje, stručnu saradnju, naglašenu sklonost timskom radu, otvorenost, iznošenje problema, prijedloga te potpuno shvatanje odgovornosti za svoj rad i odanost interesima javnog preduzeća.

## **IV OBAVEZA UPOZNAVANJA SADRŽAJA KODEKSA**

### **Član 15.**

Sva povezana lica su obavezna potpisati izjavu o prihvatanju Etičkog kodeksa. Izjava je sastavni dio Kodeksa i potpisuje se u dva primjerka, od kojih se jedan primjerak zadržava u arhivi, drugi u personalnom dosijeu. Povezana lica su dužna da djeluju u skladu sa odredbama Kodeksa.

## **V POSTUPAK IZMJENE I DOPUNE ETIČKOG KODEKSA**

### **Član 16.**

Etički kodeks donosi Skupština JP Autoceste FBiH na prijedlog Nadzornog odbora u saradnji sa Odborom za reviziju, kao njegove izmjene i dopune.

## Član 17.

Stupanjem na snagu ovog Etičkog kodeksa prestaje da važi Etički kodeks broj: 12-01-1478/11 od 17.03.2011. godine.

## VI ZAVRŠNE ODREDBE

## Član 18.

Ovaj Etički kodeks stupa na snagu od dana objavljivanja na oglasnoj tabli.

Predstavnik državnog kapitala:

Pavo Boban  
  


Broj: 1.1-2272-4/14  
Mostar, 17.06.2014. godine